

**Uunga siunnersuut: Sulisoqarnermut akitsuut pillugu Inatsisartut inatsisaata allanngortinneqarnera pillugu Inatsisartut inatsisaat****Saqqummiussissut**

(Aningaasaqarnermut Aatsitassanullu Naalakkersuisoq)

**Siullermeerneqarnera**

Sulisoqarnermut akitsuut pillugu Inatsisartut inatsisaata allanngortinneqarnissaa pillugu siunnersuut Naalakkersuisut sinnerlugit saqqummiutissavara.

Sulisoqarnermut akitsuutip akilernissaanut piffissaliussap siunnersuutip kingunerisaanik assigilissavai akileraarutit A-t aamma iluanaarutisianit akileraarutit akilernissaannut piffissaliussat, piffissaliussamut maanna atuuttumut naleqqiullugu 2013-imi ukiakkut ataatsimiinnermi ullunik 11-it missaannik sivitsorneqartut. Piffissaliussamik taamanikkut sivitsuinerup siunertaraa akileraarutit akilerneqartarnerinik pisariillisaanissaq suliarineqartarnerannillu pitsanngorsaanissaq.

Sulisoqarnermut akitsuutip akilerneqarnissaanut piffissaliussap akileraarutit A-t aamma iluanaarutisianit akileraarutit akilerneqarnissaannut piffissaliussatuulli qaammatip akiligassanngorfiup kingorna qaammatip tulluuttup ulluisa aallaqqaataannut allanngortinneqarnissaa siunnersuutaavoq.

Assigiilersitsineq Akileraartarnermut Aqutsisoqarfiup sulisitsisut akiliutaannik naatsorsuutitut nalunaarsuilluni maanna allaffissornerata ilaanik sipaaruteqarnissamik kinguneqassangattinneqarpoq.

Inatsisissatut siunnersuut tassungalu oqaaseqatit naggataatigut innersuussutigaaqka.

Siunnersuut Naalakkersuisut sinnerlugit matumuuna Inatsisartunut suliassanngortippara, aammalu Aningaasaqarnermut Akileraartarnermullu Ataatsimiititaliami suliarineqareerpat aappasaaniigassanngortillugu.